

**Naalakkersuisut Siulittaasuata Kuupik Kleistip Namminersornerup  
atuutilernejarnerani 21. juni 2009 ullaakkut oqalugiaataa**

Asasakka Nunaqqatikka.

Ullaaq iterpugut misigissuseq nutaarluinnaq pigalugu.

Itepugut neriutit nutaarluinnaat uummammioralugit.

Nunatta oqaluttuarisaanerani nutaamik alloriartussanngorpugut. Ulloq manna pingaartoq, persuarsionartoq kingumullu qiviarluta killitsisimanannngitsuunngitsoq aallarnerparput. Itepugut soorlulusooq aperlaami illerngit nutaat kinguaatta aqquasaagassaat pilersittussanngorlugit.

Inuiattut ullorsiornerput eqqorlugu Namminersulernitsinni tamassi qamannga pisumik pilluangaaritsi.

Siunissatta qaamaasuunissaa inerititaqarfiulluarnissaalu neriutigaarput kissaateqarfigalugulu. Namminersornerup atuutilernejaragut periarfissagut nutaat ammarput soorlulusooq matorsuit aqquasaagassavut qiverneqartut.

Inuianguuvugut ikittunnguit ullumilu angusarput imaannaanngeqaaq. Ullumimiit inuiattut akuerisaavugut – akuerisaavugut inuiassuarput allanut naligiissinneqarluta. Inuiaat allat pilliuteqangaaqqaarlutik akuerisaaneq angusarpaat uagulli oqaloqatigiinneq, paaseqatigiinneq ataqeqatigiinnerlu aqutugalugit tamanna anguarput.

Manna anguarput innuttaasugut tamatta nammaqatigiinnitsigut. Sulinitta inerititaraa ullumi angusarput. Angusarqarpugut paaseqatigiissinnaagatta, ikioqatigiissinnaagatta suleqatigiissinnaagattalu. Inuiaat allorassaaqatigiilluta Namminersorneq anguarput pissutissaqarluarpugullu nuannaassalluta immitsinnullu pilluaqqussalluta.

Atagumi ataqatigiinnerup, nuannaarnerup angusarqartutullu misiginerup pilluarnartua immikkorluinnaq misiginialaariartigu....

misigaajuk nukik qamani pinngortoq? Nukik taanna ingerlaqqinnissatsinni atorfissaqartipparput.

Suliassarpassuaqarpugut qularinngilluinnarparalu ataqatigiinnitsigut kikkuugaluaruttalu aamma naligiittut misigitinneqarnitsigut angusassagut angusaaqqaarigut. Tamattami atorfissaqartinneqarpugut, suulluunniimmi inuiaqatigiinni suliarigaluaritsigit tamatta iluaqutissaasumik suliaqarpugut. Tamatta inuiaqatigiittut ingerlatitaanitsinni kivitseqatigiippugut tamattalu immitsinnut timikkut tarnikkullu pilersorsinnaajumalluta kiffaanngissuseqarumavugut.

Meeqqaniit, inuusuttuniit utoqqarnut tamavitta atorfissaqartinneqarpugut. Meeqqat, inuusuttut utoqqaallu inuunitsinni nukissamik tunioraajuartuupput. Meeqqat inuunermi nukissamik nutaamik tunioraasuupput, inuusuttut kajumissusermik utoqqartavullu misilittakkamikkut inuunermik kimeqalersitsisuupput pinngitsoorsinnaanngisavut.

Namminersorneq uagutsinnut nutaamik piunasaqaateqarpoq. Akisussaaffimmik annertunerusumik tigusinissaq piareersimaffigigatsigu Namminersorneq angerparput. Angeratsigulu takutipparput nammineerluta Nunarput aqukkusukkatsigu inuunitsinnullu immitsinnut akisussaaffigerusukkatta.

Namminersorneq pimoorussisumik timalissagutsigu uagut kisitta timaliisuusinnaavugut. Piumassuserput kisimi apeqqutaavoq. Sulinerulernitsigut immitsinnut nappassinnaassuseqarnerput taamatullu inuiattut kiffaanngissuseqarnerput annertusassavarput. Sulissaagut kisiannili aamma inuiattut nukittorsarnissarput pisariaqarpoq.

Inuiattut nukittunerulerutta immitsinnut nappassinnaassuseqarnerput patajaannerulissaaq. Tunngavigisarput aalajaannerulissaaq periarinnaassuseqarnerpullu annertusissaaq. Toqqissinartumimmi tunngaveqarnerup sumorsuaq angusaqartitsisinnaanera nalunngilarput.

Ullumi ulloq immikkorluinnaq pingaaqaaq ullumimiimmi oqaatsivut pisortatigoortumik oqaasiulerput. Oqaatsivut kinaassusitsinnit avissartinneqarsinnaanngillat taamaattumillu sutigut tamatigut inuunitsinni kimittunerusumik atortinneqalernissaat sulissutigissavarput. Imaanngilaq aatsaat persuarsiornartumik oqalugialeraangatta oqaatsitta pisortatigoortumik oqaasiunerat eqqaasassagipput. Taamaakkaluartorli aamma oqaatsivut inoqatitsinnut allanut naqisimanninniutitut atussanngilagut. Tamatta ikorfartoqatigiilluta akaareqatigiillutalu nunatta siunissaa pitsaanerpaaq tunaartaralugu ingerlaqatigiissaagut periarfissagut naligiissillugit.

Nunarpummi nunaassaaq aamma allamiunit tikilluaqqusaanermik misigisaqarfiusoq.

Nunarsuarmioqataavugut aatsaallu taamak oqaloqataanissamik pisariaqartitsititigilerpugut.

Immitsinnut naammagisimaaginnarluta ingerlaniarsinnaanngilagut. Namminersorneq atuutitilerparput Nunatta nunarsuarmioqatitsinnit aatsaat taamak isiginiarneqaleruttorfiani. Avatitsinniit malinnaaffigineqartorujussuuvugut, aperisoqarsinnaavorlu soqutigineqarnerujussuarput sumut atussaneripput. Nunarsuarmi oqaloqataanikkut periarfissanik nutaanik ujartuinnermut atussavarput.

Nunarput periarfissanik ulikkaarpoq ammasumillu tatiginnittumillu pissuseqarutta aqcutissat periarfissavullu nutaat ammassaqqaarput.

Eqqarsaatinukua aalajangiisuusartorujussuusut. Ajunngitsussamik isumaqarluta eqqarsaatit qaamasut pigalugit Namminersorneq kissaateqarfigitigu.

Upperaara Namminersornermi inuiaat nukittuut, ilinniarsimalluartut piumassuseqarluartullu pilersissagigut. Tunngavik pigereerparput eqqaaginnartigimmi siulersuagut imaannaanngitsut allanik isumalluuteqaratik imminnut napatissimasut.

Pinertungaarlutik inuusimapput qajaannannguaq angallatigalugu uluinnaanguarlu sorpassuarnut angusaqaatigalugu. Qajaannannguaq imarsuaq angallavigisarpaat piumassusertillu kisiat nukigalugu nunami peqqarniissinnaasumi kisiannili aamma nalissaqanngitsumik alianaassuseqartumi aniguisimapput uagut allaat ullumi maani nikorfasinnaalersilluta.

Maaniippugut uagut kalaaliusugut suut tamarmik imminnut ataqatigiinnerannik eqqarsariaaseqarnermik pigisaqarnerput peqqaalluni. Silap inuullu avissartitassaannngitsumik ataqatigiittuunerannik paasinninnerput peqqaalluni – silarsuup avatangiisitta – pinngortitarsuaq taassumalu tunniussinnaasaasa inuullu silaqassusiata ataqatigiittuunerannik paasinninnerput peqqaalluni.

Taama eqqarsariartaaseqarnek siulitsinnit kingornussaraarput erlinnartuutitut qaqugorsuarmut pigisassatut.

Alla aamma kingornussaraarput pigisariinnagarput eqqaakulanngisarpullu. Nuannaarutissanik ujjartuiuarneq – illarneq illassamullu qaninneq. Kingornussa q erianartoq peqqinnermillu tunisisuusooq. Peqqissuunissarmi aamma Namminersornermi pisariaqartingaarpaput.

Ullumi nalliuttorsiorpugut avataaniit tikeraarterpassuit peqatigalugit. Nuannaarutigaara taama amerlatigisut nalliuttorsiornermi ilagerusummatigut. Taakku kissalaartumik tikilluaqqutigit puigunaatsumillu misigisaqartinnissaat tamatta peqataaffigitigu.

Aamma nuannaarutigaara Ataqqinartorsuaq Dronning Margrethe, Kunngikkormiutullu ataqqinassuseqartut Prins Henrik, Kunngissaq Frederik nuliaalu Mary pingaartorsiornermi peqatigisinnaammatigut.

Ullumi Ullortunermi Namminersornerup atuutitilerneqarnerata nalliuttorsiornermi qanortoq silarsuup qaamanermik tunisinera nakussasaatigilluartigu. Qaamaneq pigalugu Namminersorneq ikaarsaarfigaarpaput qanortorlu siunissami aqqut ingerlaarfigisassarpaput qaamasuujarili.

Tamassi nalliuttorsiorluarnissassinnik kissaappassi.